



Headline: Terjerat Macau Scam: Pesara guru rugi RM188,000  
Publication/Portal: Utusan Sarawak  
Date: 4 October 2018

Language: Malay  
Section: Berita Perdana  
Page: 1

# Terjerat Macau Scam: Pesara guru rugi RM188,000

FENNY SILONG

**KUCHING:** Tiga mangsa terjerat dalam Macau Scam atau panggilan palsu kelmarin, manakala lima lagi berjaya mengelak jenayah terbabit.

Ketua Jabatan Siasatan Jenayah Komersial (JSJK) Polis Negeri Sarawak, Supt. Mustafa Kamal Gani Abdullah menerusi satu kenyataan media berkata, jumlah kerugian yang dialami daripada ketiga-tiga kes adalah berjumlah RM235,800.

"Dua kejadian berlaku di Kuching dan satu lagi di Sri Aman. Kesemua mangsa adalah wanita," katanya.

Menurutnya, mangsa pertama adalah seorang pesara guru dari Kuching yang kerugian sebanyak RM188,000.

"Suspek menghubungi mangsa dengan menyamar sebagai anggota polis dari Kuala Terengganu dan meminta butiran peribadi akaun bank termasuk *username*, *password* dan OTP (*one time password*).

"Suspek mendakwa mangsa terlibat dalam kegiatan penggubahan wang haram dan pengedaran dadah," jelasnya.

Justeru, katanya, wang dari akaun

mangsa dipindah beberapa kali secara *online* dari 27 September hingga 1 Oktober lalu.

Gani turut berkata, mangsa kedua pula merupakan seorang pembantu tadbir sektor awam yang mengalami kerugian sebanyak RM32,000.

"Suspek menghubungi mangsa yang juga menyamar sebagai anggota polis dari Bukit Aman.

"Suspek mendakwa mangsa disyaki terlibat dalam kes Bantuan Rakyat 1Malaysia (BR1M) dan penggelapan wang berjumlah RM50,000," tegasnya.

Menurutnya, mangsa kemudiannya disambungkan kepada beberapa rakan suspek yang turut menyamar sebagai anggota polis.

Katanya, mangsa ternedaya dan memasukkan wang sebanyak tiga kali ke akaun suspek pada 1 dan 2 Oktober.

Mangsa ketiga menurut Gani adalah seorang setiausaha sektor swasta yang mengalami kerugian berjumlah RM15,800.

"Suspek menghubungi mangsa mendakwa dari Mahkamah Majistret Kuala Terengganu dan mendakwa mangsa mempunyai pinjaman peribadi sebanyak RM50,000 dari sebuah bank.



Seorang pesara guru dari Kuching mengalami kerugian sebanyak RM188,000 akibat Macau Scam.

"Talian kemudiannya disambungkan kepada rakan suspek yang menyamar sebagai anggota polis dan melakukan 'siasatan' termasuk meminta data peribadi Kumpulan Wang Simpanan Pekerja (KWSP) mangsa," ujarnya.

Jelasnya, rakan suspek juga mendakwa data peribadi mangsa digunakan untuk membuka akaun di sebuah bank berlainan bagi tujuan wang haram dalam aktiviti membuat dadah.

Katanya, talian telefon turut disambungkan dengan seorang lagi rakan suspek yang menyamar sebagai Inspektor Polis apabila mangsa turut 'disiasat' dalam perkara sama.

Malah, menurutnya, suspek juga mendakwa seorang penjahat telah ditangkap dan jika mangsa tidak memberi kerjasama, beliau akan ditahan.

Katanya, bimbang ditahan, mangsa memasukkan wang beberapa kali ke akaun suspek dari 25 September hingga 1 Oktober lalu.